

## Rudy Lampe a cuminsa caso di daño per huicio contra Parlamentario Booshi Wever

**ORANJESTAD** — Rudy Lampe, asisti pa su abogado mr. Flanegin, a cuminsa un caso di daño per huicio contra Parlamentario Booshi Wever. Investigacion cu redactor di casonan di Corte a haci ta muestra cu señor Lampe a cuminsa un caso civil y cu señor Wever ta wordo representa pa abogado mr. Ruiz. Señor Lampe a cuminsa e caso aki despues cu na December 2010, Corte a condena señor Wever pa e expresionnan cu el a haci den Parlamento den direccion di Lampe. Lampe mester a sigui un procedura contra Ministerio Publico caminda finalmente el a haya razon y Hof a ordena Ministerio Publico pa persigui señor Wever. Hues den su sentencia di December 2010 ta haya cu señor Wever no solamente a tacha e nomber y honor di señor Lampe como persona sino tambe su funcion como pastor Catolico y politico. E expresionnan di señor Wever, como un politico hopi conoci, a wordo haci hustamente den un comunidad catolico chikito. Hues ta haya cu señor Wever a comporta su mes hopi malo den comunidad pa cu señor Lampe. Hues a rechaza e demanda di



**Rudy Lampe**

50 mil florin di daño cu señor Lampe a demanda pasobra na opinion di Hues den un caso penal no ta facil pa determina e magnitud di e suma cu lo mester paga como daño. Hues ta kere cu señor Lampe lo por cuminsa un caso civil pa logra esaki.

Hues su sentencia ta cu e ta condena Wever na 2 siman condicional di prison cu un tempo di prueba di 3 año. Como condicion special manera na e tempo di prueba

aki, Hues a ordena señor Wever pa abstene di haci expresionnan di e indole ariba menciona den direccion di Lampe o sea cu Hues ta prohibi señor Wever pa yama señor Lampe pa pedofile.

Ta hustamente e recomendacion di Hues, señor Lampe a sigui esta pa cuminsa un caso civil contra señor Wever. Por a compronde cu e demanda di señor Lampe ta un suma considerable cu ta mas cu loke el a demanda den e caso penal. □